

編號 1 號

【路燈著咧】林伯殷原作

臨暗邊，天還已亮，屋脣个路燈就著咧，係無看較真兜，頭下碼<sup>1</sup>還正經毋知路燈著咧，一直愛等到天轉暗，路燈个火正會緊來緊光，正確確實實知自家屋脣个路燈著咧！在暗晡時頭，這支路燈摺係屋脣个大路箭到<sup>2</sup>光光，摺出出入入个人、車仔照到清清楚楚，逐日食飽夜以後，鄰舍會企在路燈下打嘴鼓，共下等垃圾車來；熱天時，屋肚較熱，路燈下自然就變成奈涼、散步个場所，等到冷天時，路燈又變成一蕊光明燈，像人摺係講，看著佢，燒暖个屋下就到咧！

臨天光，路燈就起勢慢慢行下戲棚，天越光，路燈火就越看毋著，最尾，連幾時烏忒个也無人知，路燈非常知進退，完全毋會去摺日頭搶光<sup>3</sup>，在日時頭，路燈就在該恬恬等，等夜來个時節做得好好發揮一下。

等到斷烏咧，路燈準時來上棚！摺負責个所在照到光光亮亮，到久咧，人嗰分路燈縱壞，毋記得佢逐夜就恁認分、恁煞

猛，一直愛到有一夜，發現本旦該光个地方還暗暗，正會知路燈原來有恁好惜。想起偌个老屋，暗晡時屋脣滿遍暗摸叮咚<sup>4</sup>，係無擎火，根本就行無路，毋使想出半步門，毋過，就算有擎手電筒行路，該細電珠仔<sup>5</sup>發出弱弱个光係照得路來，會驚頭那頂有蜷崎網無看著，係照得頭那頂來，又驚蛇哥隨時會對路脣弄出來<sup>6</sup>，毋管自家仰般細心細意，心肝肚還係會驚驚險險<sup>7</sup>，仰當得<sup>8</sup>這下个路燈火，分人恁安心、恁自在！

一支路燈，照光个地方盡有限，毋過，路燈係一支一支連起來，該就做得照亮一隻莊頭、一條街路、一座都市。路燈毋單淨照亮一隻地方，也減少忒日摺夜个爭差<sup>9</sup>，改變人个生活。都市肚个公園，暗晡頭還有人打氣功、跳舞摺運動，大路町也還有人行路摺騎自行車，係無路燈，敢有可能？

暗咧！路燈又著咧！偌知路燈會摺當多暗暗个地方照到光光，分人方便上下、分人做得安心，偌也知有當多人摺路燈共樣，恬恬在該照亮偲俚个社會。

<sup>1</sup> 頭下碼：音 teu ha<sup>+</sup> ma<sup>-</sup>；剛開始的時候。

<sup>2</sup> 箭到：音 zien<sup>-</sup> do<sup>-</sup>；被光照到。

<sup>3</sup> 搶光：音 ciong<sup>-</sup> gong<sup>-</sup>；爭著出風頭。

<sup>4</sup> 暗摸叮咚：音 am<sup>-</sup> mo<sup>-</sup> din dung；天色或環境暗得看不見的樣子，形容一片漆黑。

<sup>5</sup> 電珠仔：音 tien<sup>+</sup> zhu<sup>-</sup> er；燈泡。

<sup>6</sup> 弄出來：音 nung<sup>-</sup> chud loi；鑽出來。

<sup>7</sup> 驚驚險險：音 giang<sup>-</sup> giang<sup>-</sup> hiam<sup>-</sup> hiam<sup>-</sup>；感到驚險可怕的樣子。

<sup>8</sup> 仰當得：音 ngiong<sup>-</sup> dong<sup>-</sup> ded；怎麼比得過。

<sup>9</sup> 爭差：音：zang<sup>-</sup> ca<sup>-</sup>；差別。

編號 2 號

【學泅水】徐姿華原作

佢一溜來斯當驚水，小學一年生該下，先生鼓勵大家學泅水，講泅水係當好个運動。佢身邊个好同學做下曉泅水咧，逞強个佢毋願輸人，轉去屋下緊嘯<sup>1</sup>阿姆講愛去學泅水。趕避暑，阿姆攞佢尋著一間溫水个游泳池，還請著名聲盡好个教練來教佢，又買一身靚靚个連身泅水衫分佢著，鼓勵佢勇敢學泅水。

第一擺去到游泳池，又驚又好。做好體操，教練渡佢攞另外四個學生仔練習沒水、學換氣；教練攞佢兜一個一個拗落游泳池，佢兜乖乖聽教練指示，攞頭那沒落水竇肚，佢嚇到盡命牯巴等游泳池礮脣、腳跂跂毋敢沾著水、嘶骸另命、噉到凜流凜串<sup>2</sup>，像分人苦毒到當慄樣；脣頭个人做下緊看佢緊笑，教練緊拐佢，佢還係噉到失聲、毋肯落水竇肚去，高不將斯請阿姆攞佢渡轉去。

該暗晡，阿爸好聲好氣鼓勵佢續等去學泅水；阿媽斯唉唉唧唧道嘆：「若係毋去上課，學費無好退，錢斯會白白了忒去。」

阿哥也分享自家學泅水个經驗，還拿出佢當愛惜个極樂仔，講愛做佢學會泅水个獎品。在大家个鼓勵之下，佢答應第二日愛再過去上游泳課咧。

第二日朝晨，阿姆愛載佢去上游泳課，追了追佢還係生拉拉、死拉拉<sup>3</sup>、拖拖擲擲毋肯停動。上課時間強強會赴毋著咧，阿姆閤到拿起雞毛掃<sup>4</sup>愛修理佢，佢試著當委屈，又驚阿姆打，又驚愛下水泅水，斯噉到馬咬樣，歸條巷仔都聽到清清楚楚。鄰舍過來關心，知佢係驚泅水正噉到大嫲聲，做下忍等笑鼓勵佢。斯恁樣，該站時間，朝晨頭巷頭巷尾若係聽著佢又噉到哇哇滾，斯知該日佢又愛去上游泳課咧。

經過三隻禮拜个練習，游泳課个同學一批一批學會走忒咧，同學換了換，佢還係手攞腳配合毋著，手記得划水咧，腳又毋記得踢水，實在無結煞。有一日，佢自家練習，毋多知手攞腳噉配合得著咧，泅有五公尺恁遠，心肝肚實在還歡喜那！佢續等練習，緊來緊熟手，手腳也緊來緊省力，膺身也緊來緊輕鬆，第一擺感受著泅水个趣味。

感謝該量時，屋下人支持也鼓勵驚水个佢面對自家个困難去學泅水，分佢有機會去克服自家軟弱个所在，這下个佢，毋單淨曉得泅水也做得堅強去迎接人生个各種挑戰。

<sup>1</sup> 嘯：音 kiau；言語糾纏。

<sup>2</sup> 凜流凜串：音 pi<sup>+</sup> lau pi<sup>+</sup> chon<sup>ˇ</sup>；鼻涕在口鼻間上下流竄。

<sup>3</sup> 生拉拉死拉拉：音 sang<sup>ˋ</sup> lai<sup>ˋ</sup> lai<sup>ˋ</sup> si<sup>ˊ</sup> lai<sup>ˋ</sup> lai<sup>ˋ</sup>；死活不肯就範。

<sup>4</sup> 雞毛掃：音 gai<sup>ˋ</sup> mo<sup>ˋ</sup> so<sup>ˋ</sup>；雞毛撻子。

編號 3 號

【拈田螺】郭亭好原作

當久毋識轉莊下，記得莊下个風特別涼、天特別青。熱天佢撈老妹長下分烈烈个日頭逼到大樹下園，坐在阿爸用粗麻索編樹枋做个晃槓仔頂高，一儕擎一支枝冰，緊舐冰緊打晃槓，涼凉个風吹來，還有樹頂歸陣蟬仔在該「揸～揸～兒～、揸～揸～兒～！」唱歌分佢兜聽，成下屋簷烏、白頭殼<sup>1</sup>這兜也來鬥鬧熱，毋驚人个膨尾鼠，也會在樹頂上上下下、跳來跳去。

言讀書个佢撈老妹歸日跔阿公、阿婆奈，有一日阿公愛去巡田水，問講想愛跔佢去拈田螺無？好搞个佢黏時應好，老妹也講愛跔。阿公蹶上棚棟<sup>2</sup>頂个閒間仔，搨出兩雙細水靴來分佢兜換，又過拿兩頂草帽仔分佢兜戴，佢自家也戴一頂大笠嫲。

阿公肩頭擎等鑊頭行頭前，佢撈老妹一儕攞一隻細錫桶跔後背，佢兜歸路啦歌哩曲當歡喜，阿公笑咪咪安謐佢兜唱著當好聽，佢兜也風神哎哎<sup>3</sup>緊唱緊大聲。行到伯公下，脣頭該平洋平洋个田，斯係阿公耕个田，阿公指等田脣个溝仔講：「你兜看，這

位斯有田螺好拈咧，跔等這細溝仔直直下，有當多田螺好拈哦！」阿公言講煞，老妹斯好擲擲仔<sup>4</sup>先跳落溝肚去開始拈咧！

佢撈老妹比賽看麼人拈較多，兩儕頭播播盡命拈拈，驚怕分人追過去，麼儕也毋認輸。一下毋堵好，老妹个水靴嘎潔落濫泥肚，水靴肚張淦淦个濫泥，老妹想愛撈腳掛鞋共下擲起來，嘎仰般都擲毋起，還緊潔緊深，佢大聲喊佢過去撈佢搵手，佢拉等佢个大腳髀兩儕共下出力，結果鞋無擲起來，兩儕嘎跔到四腳惹天，搵到歸身潦潦還合泥混混仔<sup>5</sup>，連面也舞到像烏貓公樣。阿公看著遽遽行兼來撈佢兜拉跔起來，再過用手定定仔撈老妹个水靴樓起來。阿公講：「你這兩隻孤盲頭<sup>6</sup>，等下轉去，佢會食若婆毋燥咧！」

驚分阿婆罵，轉到屋下，佢兩儕偷偷躡躡<sup>7</sup>趕落屋肚去，阿婆影著兩隻烏貓公轉來咧，又悶又好笑，喊佢兜遽遽去洗身，撈歸身烏疏滴落<sup>8</sup>个衫褲換下來。該載好性體个阿婆無發悶，毋過，還記得該日洗身洗當久，硬硬會鑊忒一層皮咧，歸身還略略仔臭泥味，這下佢見看著田螺斯會想著這擺生趣个事情。

<sup>1</sup> 白頭殼：音 pag` teu hog；鳥名，白頭翁。

<sup>2</sup> 棚棟：音 pang chin`；放東西的閣樓。

<sup>3</sup> 風神哎哎：音 fung` shin ngai` ngai`；洋洋得意。

<sup>4</sup> 好擲擲仔：音 hau` zied` zied` er；興沖沖的樣子。

<sup>5</sup> 泥混混仔：音 nai gun` gun` er；形容沾滿了泥土。

<sup>6</sup> 孤盲頭：音 go` mo` teu；在此為「好傢伙」的意思。

<sup>7</sup> 偷偷躡躡：音 teu` teu` ngiab ngiab；偷偷摸摸，暗中央藏的樣子。

<sup>8</sup> 烏疏滴落：音 vu` so did` dab`；烏漆抹黑的樣子。

編號 4 號

【滿天星】李得福原作

來到屏東姐公个菁園肚，看著一行一行高天天个檳榔樹，聽講二、三十年前，一分地一年做得收成十過萬銀，還愛牽電火掌菁仔，園肚係有火光，賊仔就毋敢來偷割。這下價數當便宜，正賣著頭擺十分之一個價錢，雖然賣毋成錢，姐公還係打理到青溜溜仔，因為菁行之間有加種時計果，做得賣加一息錢。檳榔樹準柱楯，利用廢電線搭棚仔，有紅電線、烏電索、雙股个白片線，脣頭用白片線牽透龍，紅烏電線橫架直架賡<sup>1</sup>成三長列過个彩色時計果棚。

逐年三月春分前後，時計果開花咧，青花托撐起吊菜色个花蕾頭，還有牽白鬚个花瓣副花帽；第二層係五皮青黃色个公花，帶當貴个花粉；最頂高層係三支像擰螺絲个扳手，又像豬仔个飯匙骨，這係嫵个花。佢識看姐公拿一支毛筆，在逐蕊花頂高蘸蘸、搵搵當像畫圖樣，佢問：「姐公，你在該做麼个？」佢指等花蕾摺佢講：「佢摺公花个花粉蘸來膏在嫵花个花蕾町，恁樣正會打子結果啊！」

<sup>1</sup> 賡：音 gang`；織。

青青个細果子在果棚頂吊到淦淦，企在棚仔底下看往上，就像看著滿天个星仔樣。姐公講佢種个時計果品種就安到「滿天星」，當像佢伸手就摸得著也摘得著，又乜食得著个星仔呢！

清明過後無幾久，時計果就轉烏黝紅，看著暗紅暗紅無青影就做得摘咧。佢兜姊妹在果棚底下，臥起頭一隻看過一隻，慢慢仔相，相著係紅到轉烏色就熟咧，甜度罅較無恁酸。摘著半菜籃遽遽扛去倒落紙箱肚，一輪、兩輪、三輪紙箱仔張到淦淦，愛載轉高雄冰起來定定仔食。熱天放學轉來，阿姆會摺時計果洗淨，在蒂頭頂高挖一隻像五十個銀恁大个空，放在水果盤町，佢兜拿細湯匙定定仔舀來食。正摘啊著个時計果特別甜，佢一下斯食忒七、八隻，酸丟酸丟<sup>2</sup>緊食緊爽口，連鼻空畀出來个氣又乜酸丟酸丟帶有時計果个味緒。

阿姆成時會摺時計果裡肚个仁摺汁挖出來，加一息冷滾水放落果汁機去打，打好用盞仔張等放冰箱冰，分佢兜準果汁食。逐擺係咁這果汁，就會想著在果棚下歸頭白毛，笑到牙西西个姐公。

<sup>2</sup> 酸丟酸丟：音 son` diu son` diu；酸溜溜地。

【畜羊仔个叔公】羅瑞霞原作

佢公有兩兄弟，佢兜戴莊肚，叔公戴在離莊頭無幾遠个石礮脣，叔公無討舖娘，一儕人戴在礮脣，畜十過條羊仔。叔公講：「一儕人過日仔較自由，又毋使愁勞博激，逐日快快樂樂，幾好呢！」

佢從細斯好遊遊野野，講著搞就一條線<sup>1</sup>，毋過平常時，愛上課、讀書，一日到暗斯國語、數學、英文、社會、電腦，搵到佢春頭磕額、頭暈腦疫，毋過到放寮日，該斯係佢个天下咧！

佢最愛去尋叔公寮，叔公屋面前係石礮，石礮脣有一大遍草，一大早羊仔斯在礮脣食草，佢見去到，看著羊仔在該食草，斯挑挑去追該兜羊仔，總愛摻羊仔追到咩～咩～咩緊叫，佢正試著生趣。該量時，叔公在屋肚聽著羊仔叫，一定會走出來看，看著佢在該追羊仔，斯罵講：「孤盲子，又在該追羊仔咧！毋驚下二擺降个細人仔無尿拙。」

佢看著叔公出來，黏時喊一聲「叔公，早啊！」叔公雖然會罵佢，毋過乜盡惜佢，因為佢係屋下唯一个孫仔。叔公笑弛弛仔

行過來，緊行緊講：「羊仔肚屎枵在該食草，你毋好撩佢，落來屋肚佢拿糖仔分你食。」講著有糖仔好食，這又係佢好來叔公屋下个原因，叔公無家無寶，一儕人戴，所以長透有好食个東西就會留起來，等寮日拿分佢食。

叔公雖然一儕人戴，毋過屋下整理到淨淨俐俐，桌頂無半點塵灰，完全看毋出佢係單身哥仔。佢識問過阿公，仰般叔公無討舖娘？阿公講：「頭擺，叔公識熟事一個戴在莊尾个細阿妹仔，該隻細妹仔生著麻筍麻筍已靚，當煞猛，兩儕感情盡好，兩家人也認定愛結親家、且姆咧，無想著有一日，該隻細妹仔在田町做事，毋堵好分蛇咬著，該量時醫藥毋發達，偲俚莊下堵著這種事情，大體都係自家拿草藥捶捶貼貼仔，斯好咧！吉知該隻細妹仔係分龜殼花咬著，無黏時送到街路分西醫看，就恁樣死忒去。這隻細妹仔死忒對叔公个打擊當大，過後叔公斯完全毋摻其他細妹仔交往，當多人愛摻叔公做媒人，都分叔公拒絕，一儕人斯徙到礮脣戴咧。你係有閒，愛長透去陪叔公哦！」

佢黏時應講：「好啊！叔公惜佢，摻佢做伴無問題啦！」

<sup>1</sup> 一條線：音 rhid tiau sien<sup>ˇ</sup>；喻專注於一事。

【放蝦公筍】郭亭好原作

禮拜六阿爸渡偈兜共下轉去莊下看阿公、阿婆；阿公看著偈兜轉來當歡喜，老妹盡會做嬌，一下斯颯去捕等阿公，講佢當想阿公，聽著老妹嘴恁甜，阿公暢到奈毋得，笑到哈哈滾。在灶下無閒个阿婆，聽著偈兜轉來，手叮擎等个鑊鏟還來毋掣放忒，斯行等出來，緊掌偈个頭那，笑微微講：「兩儕都較高也較作肉<sup>1</sup>咧！還好哪！」

睡當晝跣起來，偈看著阿公當無閒在該用白飯攪糠仔，攪好先分佢歸團，過後正斷做一細團、一細團放落蝦公筍<sup>2</sup>裡肚，佢講等下愛去放蝦公筍咧。聽著愛放蝦公筍，偈試著當生趣斯嚟<sup>3</sup>愛跲，頭下碼阿公驚偈危險毋肯分偈跲，偈緊攆阿公保證偈會細義，高不將阿公正渡偈共下去。

河壩肚滿哪仔都係生溜苔个石牯，偈著等水靴行路當毋慣，行無兩步腳斯險險溜著，該載阿公盡流掠，遽遽攆偈揪等，佢講逐步腳都愛先試踩看仔，係毋會滑正好踩上去。偈兜慢慢行到水

較淺个位所，阿公教偈蝦公筍愛放在水較恬又有石縫个地方，佢先攆水底个細砂石用手掙平分蝦公筍做得貼地，還愛攆蝦公筍个嘴順等水流向往落，再過拿石頭砵在蝦公筍面頂，講恁樣蝦公筍正毋會分水打走，最尾還愛在脣頭个大石頭面頂放幾隻細石牯做記號，恁樣，收蝦公筍个時節，斯知蝦公筍放在哪位咧。偈兜順等河壩攆蝦公筍一路放等去，到會暗昏咧正做下放好勢。

本來攆阿公講好第二日愛共下去收蝦公筍个，偈嘎睡到日頭晒屎肫咧都還盲跲。阿公自家攆蝦公筍歸下收轉來，正喊偈跲床攆佢共下退蝦公筍。偈聽著阿公喊，煞煞跳跲起來，牙齒儘採鑊兩下斯躡等出去<sup>4</sup>攆阿公搵手。逐隻蝦公筍張著个東西無麼个共樣，退一隻蝦公筍斯像開一到獎，有个張著蝦公、齊口，有个張著毛蟹、石斑，成下還會張著湖鰱仔，實在還生趣。

這兜對鮮鮮河壩水來个好食材，當晝在阿婆个好手路料理之下，歸桌都係又姜又好食个魚仔、蝦公攆阿婆自家種个青菜，非常豐沛，飯桌頂偈兜緊食飯緊講笑，因為心情歡喜試著逐樣菜都恁好食。臨暗仔偈兜愛轉咧，車仔正駛啊停動，偈遽遽攆窗門絞下來，大聲喊講：「阿公！下二擺愛放蝦公筍个時節，定著愛記得渡偈共下去哦！」阿公緊攉手，頭那緊領、緊應好。

<sup>1</sup> 作肉：音 zog ngiug；長肉、生肉。

<sup>2</sup> 蝦公筍：音 ha gung` ho；竹製的捕魚、蝦器具。

<sup>3</sup> 嚟：音 kiau；言語糾纏。

<sup>4</sup> 躡等出去：音 liung` nen` chud hi`；衝出去。

【大樹下】謝玉賢 原作

記得做細人个時節，佢屋下面前有條細河壩，河壩肚長下看著有幾下隻鴨仔在該泗上泗下，成時佢兜細人仔也會跳落去，撈鴨仔共下搞水，你戽佢，佢戽你，搞到歸身溼漉漉正轉。毋過，分佢印象最深个毋係該條細河壩，係河壩脣个該頭大樹。

該頭大樹，佢个名仔安到爛布樹，樹中央係空心个，毋過佢當耐命，逐年正開始熱，樹葉仔斯跌到滿地泥，四叔就蹶到樹頂，撈樹桠鋸<sup>1</sup>到淨淨，毋使幾久，爛布樹又會綻筍，樹桠一枝一枝，葉仔生到淦淦，大樹底下就係大家唱歌奈涼个好所在，也係細人仔搞奈个好地方。

大樹下長透坐一大群人，逐儕都擎等一支扇仔撥啊撥仔，在該打嘴鼓，七個和尚八樣腔<sup>2</sup>，下屋个阿真叔講厥俵仔愛做兵咧，佢逐日愁到無結無煞，愁俵仔做兵毋知會分人欺負無？見擺講起斯目汁落落跌<sup>3</sup>；上屋个叔姆，就講佢个妹仔下禮拜愛嫁人，喊大家分佢請，問大家嫁妹仔有麼个禮俗無？愛砵男家頭麼个？案耙

愛打幾多斤？扇仔愛分麼儕拈？帶路雞愛幾多隻？雖然有一大堆个問題，毋過叔姆還係當歡喜，暢到牙西西<sup>4</sup>；佢姆乜輸人毋輸陣，撈大家講妹仔考著師專咧，加幾年卒業就做得做先生，搵手賺錢咧。大家你一句、佢一句鬧熱煎煎<sup>5</sup>，有人噉也有人笑，實在還生趣。

大樹下，這片大人在該打嘴鼓，該片个細人仔乜無閒著，細妹仔在大樹下搞份家啦，你做爺仔佢做哀，爛布子串起來做戩鍊、石頭結起來做烘爐；樹葉仔做青菜、樹桠做箸，大家搞到當歡喜。細俵仔有兜在該搞園人尋、打紙牌；有兜搞圓子、透土狗仔<sup>6</sup>，這兜綻剝頭<sup>7</sup>，逐個精砵砵仔<sup>8</sup>，看著一團鬆泥就知下背有土狗仔，七手八腳撈鬆泥要開<sup>9</sup>、攞水、倒水，毋使幾久土狗仔就走出來咧，這群細人仔長透搞到愛大人擎等竹修仔喊正肯轉屋下，實在無結煞。

大樹下有佢當多个回憶，係隔壁鄰舍聯絡感情个所在，也係細人仔搞奈个好地方。雖然童年離佢當遠咧，毋過記憶肚个童年還像人在昨晡日樣；該頭根深葉靚个爛布樹，就像一支大大支个遮仔，保護佢兜行過艱難又辛苦个日仔，該頭堅韌又耐命个大樹，到這下還係佢生命中精神个寄託。

<sup>4</sup> 牙西西：音 nga si` si`；牙齒微露，輕鬆愉快的微笑。

<sup>5</sup> 鬧熱煎煎：音 nau+ ngied` zien` zien`；形容非常熱鬧的樣子。

<sup>6</sup> 透土狗仔：音 teu+ tu` gieu` er；灌蟋蟀。

<sup>7</sup> 綻剝頭：音 can` dog` teu；頑皮鬼。

<sup>8</sup> 精砵砵仔：音 zin` guag` guag` er；精明的樣子。

<sup>9</sup> 要開：音 fung` koi`；撥開。

<sup>1</sup> 鋸：音 loi`；削平。

<sup>2</sup> 七個和尚八樣腔：音 cid gai` vo shong+ bad rhong+ kiong`；形容人多口雜，主張不一致，各有各的說法。

<sup>3</sup> 目汁落落跌：音 mug zhib dab` dab` died；淚流不止。

編號 8 號

【該條大崎】黃美貞原作

戴在這伙房个人家，出出入入定著愛經過大崎，頭擺在該位種有一大片个香絲樹，所以大崎又安到「香絲坪」。對細人仔來講，出門讀書愛蹶崎斯已難耐，毋過日仔總係愛過，香絲坪也變成大家生活个一部分，佢最記得个就係膠阿雪溜大崎無擋仔發生个事故。

上屋个阿雪大佢三歲，五年生該下，就自家騎自行車去讀書，上大崎个時節，愛企起來盡命拈箭，箭毋贏咧正甘願下來用牽个，書包仔放在頭前个籃仔肚，看起來風神哎哎<sup>1</sup>，該量時，細人伴都當欽羨佢。有一擺，佢在大崎堵著阿雪，佢講：「佢載你下崎愛無？」佢想著阿姆个叮嚀，遽遽搖頭講：「毋使毋使，佢自家行等轉就好咧。」阿雪當有自信講：「佢日日斯溜等轉，又遽又爽快，加勝<sup>2</sup>擋仔皮正換過新个，愁麼个？」佢用手試撚仔，車仔黏時頓恬<sup>3</sup>，看起來已妥當，心肝肚想，試一擺斯好，阿姆毋會知啦！

<sup>1</sup> 風神哎哎：音 fung` shin ngai` ngai`；洋洋得意。

<sup>2</sup> 加勝：音 ga` shin`；更加。

<sup>3</sup> 頓恬：音 dun` diam`；停止。

蹶上車，在崎頂看啊下去，阿姆哀！腳底撓撓，雞嫲皮膨膨起，阿雪講：「你會驚係無？」佢毋願認輸應佢：「有麼个好驚？」其實佢驚到會死又毋敢講。阿雪吩咐佢愛扳好勢來，佢兩隻手揪等佢个衫，目珠眨到密密，車仔順順仔溜下去，聽著唧唧滾个擋仔聲，心肝加已定貼，按算加一下仔就到咧。無想著，溜到半崎仔个時節，擋仔嘎恬忒，這時，阿雪放勢牯喊：「無擋仔咧！這擺死無命咧！」佢毋知愛仰結煞，斯會跔等阿雪緊喊。

「砰～」聲！車仔正正撞落一墩笏竹去，佢擘開目珠，看著阿雪橫在竹頭下，企毋起來，緊噉緊呻：「還痛！還痛！」佢摸一下溼溼个鼻空，手巴掌全係血，原來係出鼻血咧，該載手腳還做得停動。佢定定仔蹶跣起來，顧毋得滿鼻空个血，一路行轉去伙房尋人，好得阿泉叔兩子爺堵好轉夜，奧多拜一頓恬，兜起廳下个藤椅，跋起腳就去膠阿雪扛轉屋下，遽遽打電話請莊頭个魏先生來檢查。阿雪也命靚，斯手腳鑪溜皮定，毋過可能係嚇著咧，暗晡頭緊發狂<sup>4</sup>，食睡毋得，厥婆還渡佢去分陂塘下个恩主公收驚。

到今想起該擺溜大崎逞英雄个戇事，心肝肚還會怒忸<sup>5</sup>一下，雞嫲皮又膨膨起。

<sup>4</sup> 發狂：音 bod kong；失去理性，舉止狂烈、異常。

<sup>5</sup> 怒忸：音 nid` nug`；受驚的樣子。